

Tschains d'aua n'è nagina almosna e nagina subvenziun

L'emprima chombra ha approvà l'autezza vertenta – tge fa il cussegl naziunal?

DA CLAUDIA CADRUVI / ANR

■ **La chombra pitschna vul salvar il tschains d'aua fin il 2024 sin il nivel dad oz. Il cussegl federal duai sutta-metter per pli tard ina proposta per in model d'in tschains flexibel. Ovras idraulicas novas vegnan plinavant liberadas durant diesch onns dal tschains.** Cun 30 cunter 13 vuschs ha la chombra pitschna decidì ch'il tschains d'aua maximal duai restar tar 110 francs. Ina minoritad avess preferì in sbassament sin 90 francs. Las regiuns da muntogna stettian a sasezzas enta pes, ha argumentà *Werner Luginbühl* (pbd/BE). Il tschains d'aua cumportia 25 pertschient dal pretsch da produenziun. Las ovras idraulicas Oberhasli hajan perquai relaschè gliued. Per las regiuns da muntogna fissi pli impurtant da pudair mantegnair piazzas da lavur che auts tschains d'aua.

«Il tschains d'aua è il pretsch per duvrar l'aua per producir forza idraulica», ha punctuà *Beat Rieder* (pcd/VS). El na saja nagina almosna ed era nagina subvenziun per las regiuns da muntogna. Plirs parlamentararis han fatg attent che las ovras relaschian oz gliued perquai ch'il svilup tecnic lubeschia da reglar ils indrizs da la centrala anor – e betg pervi dal tschains d'aua.

Maioritad magra

Cun 32 cunter 30 vuschs ha la chombra decidì ch'il cussegl federal duai sutta-



Ils dus cussegliers dals chantuns dal Grischun **Stefan Engler** (pcd) e **Martin Schmid** (pld) èn satisfatgs dal resultat da la votaziun en il cussegl dals chantuns.

KEYSTONE

metter ina proposta per in tschains d'aua flexibel per il temp a partir dal 2025. La minoritad avess preferì da laschar maun liber al cussegl federal. *Stefan Engler* (pcd/GR) ha avertì da betg schon uss

tschentiar ils binaris e fixar in sistem. Ins na sappia per exempel betg sche la fiera da current vegnia anc averta per tuts consuments. «Ord vista dad oz munta il 2025 in viadi mundial.»

Sch'ins giavischia in sistem flexibel stuessia en mintga cas era valair «open box» per ils quints dals concerns d'energia, ha ditg Engler. Lezs stuessan mussar or ch'ils pretschs d'energia sajan com-

mensurads, co ch'els fetschian amortisaziuns e pajan dividendas. Lura sa mussassia forsa era ch'il tschains d'aua na cumportia betg exnum 25 pertschient dal pretsch da produenziun.

Plirs parlamentararis han punctuà ch'ils pretschs da current creschian dapi il 2016 e che la forza d'aua daventia puspè pli cumpetitiva. *Werner Hösli* (pps/GL) ha regurdà al fatg ch'ins possia gea gia oz sbassar il tschains d'aua. Lez saja fixà sco maximum ed ils chantuns Giura, Zug, Vallais e Berna pretendian in tschains pli bass.

I na dettia betg bleras alternativs tar in model flexibel, ha ditg la ministra d'energia *Doris Leuthard*. Per il cussegl federal na sa midia betg blier sch'il parlament fixeschia gia uss in model flexibel. La forza idraulica saja la pitga pli impurtanta per il provediment da current en Svizra. Impurtant saja perquai che la forza idraulica restia pajabla e cumpetitiva.

Dus puncts incontestads

Senza discussiun ha la chombra pitschna approvà che novas ovras idraulicas na ston pajar durant diesch onns nagin tschains d'aua. Plinavant na ston ovras ch'èn vegnidas engrondidas considerablain betg pajar tschains sin la prestaziuns supplementara durant diesch onns.

Il cussegl federal duai plinavant dastgar far contracts internaziunals davart il diever da la forza d'aua da flums u lais sin ils cunfins da la Svizra. La fatschenta va uss en il cussegl naziunal.